

唐確慎公集

冊四

唐確慎公集卷八

詩

都門留別

清和三月初風景麗以郁驅車策征途款款悅心
曲駕言何所之滄江一林麓曠懷天地間所喻豈
在獨赤雲卷晴空飛鳥極遠矚行行復行行何爲
苦羈束

古道如棄薪吾儒亦敝帚杖策就優游非敢弛吾
負所聞日益新遇物失其舊春煦轉嚴威微颺扇
輕柳既往孰不來天理至悠久勉勉策前修聚散
復何有

皓日照丹崖玉露布和澤如此浩蕩中斯人亦自
得豈知患害干微茫不可測巨靈竄太華此任竟

誰責鳳凰鳴高岡吉士滿邦國修德以待時看君
奮六翮

昭昭天宇高鼎鼎初月早行人將遠遊何必問飢
飽勁節歷嚴霜雖冬不枯槁友朋弗我棄吾亦忘
其老同心懷古懽往往見意表言之復長言立身
以爲寶

題古樗山房讀書圖

讀書亦多門所貴在窮理窮理亦有要卽事求其
是自受天地中懿德備性體奈何棄不講悠忽甘
廢弛自守聖賢教正學系道揆奈何置弗聞紛馳
失塗軌夸哉誕譎子動輒詫聞見寶書百二十堯
典十四萬局矣邨究家一生困槩牘失劍方刻舟
遺珠但買櫝更有詞賦流意氣干雲上一字九還

丹矜喜出羣黨汝當端其本勿與流俗俱治心重
克復立身重規模一念三檢點弗爲情欲驅一事
三持循弗爲習染濡提撕在衾影存養通鳶魚以
是對編簡不負此居諸以是求義理不蹈乎虛無
嗟予年就衰所憚志益懈爾室嚴旦明欺來有至
戒展甥讀書圖用以申此意

丁未八月由長沙返權金陵留別詩

秋颼動輕涼炎歊殺餘烈日月互推遷人事有離
別衡疑非不高瀟湘非不潔遊子千里心一念千
懷結

所學終無成著書亦草草有如已退筆愈折亦愈
老友朋莫之嗤譽多箴砭少因之日滋懼不敢忘
遠紹

讀書思古人掩書憶良友孰知歸去來亦種先生

柳得失亦何常進退期無負東籬適所安不必陶

潛酒

謂賀
耦庚

蘭蕙滿空山風雨懷君子豈知若而人所居共塵

市到門無輪蹄插架有經史吾欲質吾疑晨起躡

輕履

謂勞
仲敦

晦翁不復作吾道苦無師榛蕪塞正路何以翦剔

之乃於衆木中迴見最高枝傲霜吾豈敢相與共

扶持

謂羅
劉霞仙

城市苦多囂賓朋恆畏俗獨有兩人來恂恂善檢

束咨我以坦途叩我以幽獨爲之策前修必使所

立卓

謂高
曹心泉

去年買舟來今年買舟去江水向東流我心向東

注安得岱下耕歲臘伏祠墓有願未遽申依依空
孺慕

辰橋屋數間溯自先人遺後有憩書樓前有養筠
謬於焉奉祐主賴以瞻前規衰老苦易怠敢負衆
所期

檢書數

縹緗亦何親所至輒滿室一日理行裝書乃居其
七筐篋不能盈囊橐亦盈溢以是致盜疑盜亦太
無別

讀書竟何爲笑我不知老老而好讀書吾亦有至
寶至寶苟不失雖窮未枯槁檢書喟然數萬事感
懷抱

狼籍亦云污滌除反之潔非有檢察功安得此污

雪展之復拭之一一去其涅以是觀吾身與書同
一列

聚書恆有年散書在一夕聚散若是慎念之長太
息是誠益我多乃竟貽之尼相對更何言低頭自
引忒

咏懷

太極一團團乃是天人理一氣大流行兩儀定綱
紀人生天地間惟理爲足恃充之卽爲仁體之卽
爲禮順之卽爲孝和之卽爲弟完其所自來亦曰
理而已始知一團中萬化由此起

天地一何寬斯人處之狹天地一何周斯人視之
乏從來貪者奢所願百不愜緣崖睇前登飲河爭
一呷只此不足心使身無著法豈知我生初賦畀

至周匝完之以秉彝廣之以德業如何盡屏棄都
爲物所劫紛紛逐外榮捷捷騁高獵遇事或乖違
低頭苦憂懞浩浩大園中草木亦訢合

萬事驀然來一人一規矩夷叔可西山周公可東
魯簞瓢爲顏回樛輶爲夏禹緬懷古聖賢窮達皆
砥柱巢許安足稱管晏更無取是以洙泗間行藏
不輕語

鳳凰音中律麒麟步中規雖然在郊輒無奈知者
希知希遂見棄不足爲深疑東海有琪樹西山有
靈芝南園有修竹北林有高枝置身已得所不異
豐與岐

道德貴寬閑意興戒蕭颯但有藜可羹何妨履不
納疏水豈知貧輕肥恐近俠兀然一青氍欲臥就

短榻只知詩禮書不問筐箱篋昨來經萑苻江湖
困遠涉蒼狗本浮雲所見復何懾友人致佳想遺
我時晴帖慰勞何其周懷之不能答

讀書方弱齡立志在壯歲厥後數十年此志亦殊
銳慄慄臨深淵滴滴辨清渭功加懲窒多學審格
致未理以實事窮事以實理會嚴防頓悟機切戒
襲取義除去獨中私奮起剛大氣瞬息皆鳶魚存
省卽天地天德純乎仁誠者識其意天道本乎中
敬者必有事惟敬自精微惟誠特廣大仁必由誠
來中不出敬外吾本愚無知安敢語深邃祗此希
古心不忘向道志

記異

一蛙聲如狗兩蛙一齊吼羣蛙次第來相呼亦相

詬或如鴨呼羣或如鷄護母或如敗鼓搗或如破
甕叩或如更擊柝應左忽應右或如樵唱山于前
復喁後或如鳥啄木著空不著朽或如僧敲門有
諾亦有否或如兒學語吞吐不出口或如客鬪某
高低不離手或如巫降神啣啍不可剖

水將至蛙
亂鳴其聲

變幻莫能
盡其狀

嗟哉數日間盛漲沒岡阜城中四十里

大半成澤藪高檐五破三矮屋十失九飽者尙樓
居飢者穿屋走沿湖膏腴地萬不獲一畝近江村
邑區百不得一有嗷嗷數千里目不見升斗此災
殊非常誰實執其咎謂蛙爲水妖妖乃自人取所
賴天心仁安全徧童叟

水漲於五月十二日盛於
十八日或日長一尺或七

八寸四五寸不等
至二十七日始定

己酉感懷四章

低頭念心身舉頭見穹昊人生造化間何得事潦
草一疏招千尤一慢致百惱褊矣人不容怠矣身
莫保護之在幽獨防之在耄老老而不加勉志將
隨俗倒老而猶發憤學可及時造兢兢課寸衷毋
失此真抱

大隱不在朝小隱不在野飢溺輸與人簞瓢合歸
我明月入窗來高枕思賢者擁書不能讀搦管不
能寫昔時學詩歌所恐才智下今時學箋註又恐
見聞寡至理非難知所爭在真假不然誇文人犢
鼻印司馬更或號經生小冠杜子夏是皆未聞道
安足稱大雅

種花非爲仁刈莽非爲義埽徑非爲禮杜門非爲
智卽事適其情見道不見器是乃在存心當審隱

微際主敬而立誠勿參亦勿貳是乃在致知當反
本原地有物必有則理同而分異是乃在力行當
知君子四子臣弟友間性盡而道至以是慎吾獨
不容妄私意以是立吾身不容卑鄙志以是改吾
過不容欺飾事以是進吾善不容怠惰氣斯道在
眼前百慮而一致

日暖而風清浩然天地廣花開而禽鳴豁然堂宇
敞中有澹淡人端居絕塵想捧卷求古先儼若嚴
師長循循弟子班終日侍函丈不敢希高明先爲
去懔慌不敢冀神妙先爲祛罔兩不敢務淹博先
爲剔榛莽非學何所從不思則爲罔爾室與持循
高山事鑽仰道當求未聞事必驗已往獨立不爲
孤羣聚豈因黨保此貞固姿藉以林泉養

卽事

振民亦何周卹民亦何曲旣傾陳藏錢又減太倉
粟太倉關正供可裕不可蹙今漕不及三所蠲乃
過六何以充儲糴何以足廩祿有司仰屋嗟當路
持籌熟亦云忠孝深庶幾輸委足久矣山澤癯世
事本不屬憂樂入懷來時復一棖觸

哭紫玖弟

平生突兀不猶人岫嶺奇峯寄此身偶一展舒雲
出岫浩然歸隱月爲鄰閒中話語多如畫腹裏詩
書不避塵親愛孰如兄最篤招魂無處倍傷神

哭爾洙

爾生亦旣靈壽命又何促非爾數本奇乃我德不
足呼之魂若來思之夢方覺爾果何所歸天地爲

化育

頤園落成

七十懸車事已陳此身本是等閒身入林未密難
逃俗闢地無多可避塵偃蹇青山猶傲我蕭疏老
圃合爲鄰爲除坎圻歸平坦或有提壺過訪人
迎得朝霞戶向東迴廊曲徑僅三弓山川顯晦由
來異今昔行藏大略同百丈原泉留古味一林新
竹養清風更從何處尋高隱只此棲遲樂在中
半種菰葵半種花編籬也學野人家炷添宿火晨
炊粥甕有餘泉夜煮茶庭草青青新雨露園蔬澹
澹舊煙霞隔牆古寺無鐘磬只聽前林噪晚鴉
贏得幽閒自在天不風不雅不神仙咸無筇竹忘
吾老壁有焦桐任爾眠玉局丹楓猶畫裏柴桑素

抱是籬邊滿城林麓皆槃澗豈必商山問四賢

九日邀侯青甫學博湯雨生協戎崔春泉山

人頤園小集

風高人愈澹地僻興殊賒荒徑勞雙屐良辰挹九
華新篁經雨綠老樹入秋嘉但有羣仙至東籬亦
可誇

和湯雨生九日招集頤園元韻

君不見行藏顯晦同一原何必避世歸治田又不
見智愚賢否共一天何必離人高飲泉所嗟顏回
或有禹稷少徒有簞瓢空潔蠲可憐山頭歎濯濯
可憐江水愁漫漫安得天生開濟手批卻導款窮
根源裁成輔相酌羸縮補綴密密絲縷穿欣聞
舜陞闢四門臣鄰拜手賡和鸞元愷疊舉共兜放

小人屏息君子餐野老何知笑嚇嚇含哺鼓腹熙
熙然手持殘編五十載是朝是野相爲緣昨來闢
地不一畝寤歌當作考槃看四壁苟完無苟美半
山求僻非求寬適當九日登高會神仙下降來盤
桓菊花半含還半吐隱約已露新容顏更有風景
應時節煙絲雨絲相綿聯新詩示我亦何切滂沱
泣下思前賢俯仰低徊恨無及卅載光陰一指彈
吁嗟乎天下何處非王土無田不歸豈非古菊乎
菊乎看汝爛漫高低開閑來插得滿頭回

頤園雨中偶成仍用九日小集韻

古韻今何在幽情此獨賒高風過翠竹細雨賽黃
華薄酒難招飲新詩屢拜嘉柴門無客至逸興向
誰誇

久雨思晴曝天應爲我賒如何留霖霖豈欲滌鉛
華草木懷彭澤山川斥永嘉貧來真樂在此意大
非誇

和韻酬青甫

高烈無過顏平原幕府有山而無田大勳孰若徐
中山瞻園有石而無泉是皆舊望他莫比所由山
川長吉蠲扶輿旁礴鬱奇氣不畏江海之淼漫環
拱疊嶂森藹藹朝宗萬派來源源龕中老佛亦眼
熱洞裏神仙曾屐穿昂藏定有九苞鳳集止定有
五采鸞赤松子以黃石隱綠髮翁惟紫芝餐醴泉
混混甘露降明霞朗朗華燭然南極老人長此應
商山四皓先爲緣健如爽鳩清如鶴人人可作彭
鏗看是知造化篤生厚教人以正養人寬安得天